

Lieus da chat archeologics en il Grischun

Fastizs da culturas preistoricas e sguards sin epocas pli recentas

■ L'onn 2000 è cumpari in numer spezial da la revista «Archeologia svizra» che preschenta, dal reminent en tut las linguas nazionalas, il stadi da la perscrutaziun archeologica en il Grischun. Ils artitgels porschan per l'ina ina survista dal temp preistoric e roman. Per l'otra vegnan preschentads chats che curran las singulas epocas da la preistorgia e dal temp roman, ma che mussan che l'archeologia s'occupa tutttavia er d'epocas istoricas pli novas (stgagis da munaidas dal temp ottonic da Cuira/St. Nicolai resp. dal 18avel tschientaner or da l'Engiadina).

Mintga nov lieu da chat pussibilitescha ipotesas e speculaziuns, ma furnescha er ulteriurs crappins da mosaic per la survista generala da las singulas epocas. L'exempel da la tschiffada da la funtauna da San Murezzan, scuverta gia il 1853 e chavada or l'onn 1907, mussa clermain quant impurtant ch'igl è ch'er chats vegls vegnan adina puspè mess en dumonda ed examinads cun novas metodas scientificas. Uschia ha pudì vegnir preschenta il 2000 la novissima dataziun da quest chat ch'è renomà lunsch sur ils cunfins dal Grischun ora.

La preistorgia dal Grischun en furma concisa

In dals lieus da chat il pli vegl dal Grischun furma la staziun dal mesoliticum tardiv e dal neoliticum tempriv da Mesauc-Tec Nev. Sco ulteriuras culegnas e piazzas da lavur neoliticus enconuscentas tschingt pitschnas staziuns ch'èn per part influenzadas nà dal nord, per part dentant er na dal sid.



Ina colonisaziun pli intensiva dal Grischun sa lascha constatar pir durant il temp da bronz, quai che pudess per part star en connex cun la prospecziun d'arom. Pliras culegnas sin collinas dal temp da bronz èn oz per part examinadas (Savognin-Padnal, Cazas-Cresta, Lumbrein/Surin-Crestaulta, Scuol-Munt, Ramosch-Mottata e.a.). Per ils chats da fossas dal temp da bronz èn impurtantas surtut las fossas dal temp da bronz tempriv da Donat e las sepulturas da cremaziun dal temp da bronz mesaun da Lumbrein/Surin-Cresta Petschna.

Plirs «stabiliments sumegliants a bastiuns» da l'Engiadina (lieus d'unfrenda da feu?), ils disegns sin grip a Seglias en Tumleatga-Carschenna e Tinizong-Senslas, differentas concentraziuns da craps da cuppas e magari er la tschiffada da la funtauna da San Murezzan fan magari patrar a lieus da cult dal temp da bronz.

Durant il temp da bronz tempriv e mesaun chatt'ins en grondas parts dal Grischun la «cultura dal temp da bronz interalpina», ma dapi il temp da bronz tardiv sent'ins ina tripartiziun culturala (cultura da Laugen-Melaun, cultura da santeris d'urnas e l'indizi d'ina gruppa da l'Italia dal Nord) ch'è sa mantegnida er anc en il temp da fier. Durant il temp da fier pon ins observar en il Grischun dal Nord ed il Grischun Central las gruppas da las vals dal Rain alpinas dal temp da fier cun ceramica dal «tip Tumein» e «tip Schneller». En Engiadina Bassa ed en la Val Müstair chattan ins ceramica da la cultura da Laugen-Melaun e da la gruppa da Fritzens-Sanzeno. En il sidvest dal Grischun domineschan ils chats dal «tip Golasecca» tar ils chats da fossas da Mesauc, Castaneda, Cama e.u.v.

Sco lieus da cult dal temp da fier vegnan registrads per l'Engiadina Bassa er puspè lieus d'unfrenda da feu (p.ex. Scuol-Russonch), per il Grischun dal Nord eventualmain puspè las petroglifas da Seglias en Tumleatga-Carschenna sco er ulteriurs lieus da chat.

En connex cun la tripartiziun culturala dal Grischun durant il temp da fier èn ins disposad da numnar la regiun Engiadina, Tirol dal Nord e dal Sid e Trentino sco «retica», la regiun Val Mesauc/Val Calan-



Lieus da chat pre- e protoistorics en il chantun Grischun.

ca sco «lepontica» u «celtoligurica» e la Val dal Rain alpina sco «celtica» u eventualmain anc sco «celtoretica».

L'areal d'abitadi dal temp da bronz e dal temp da fier da Cazas-Cresta

L'areal d'abitadi sin la collina da Cazas-Cresta è vegnì scuvert il 1942. Fin l'onn 1970 è el vegnì exchavà en 13 campagnas dal Museum nazional svizzer. Ils abitadis che derivan dal temp da bronz tempriv fin il temp da fier eran concepids en retschas, e mintgama cun in'unica lingia da chasas, en duas sfessas che mainan dal nord al sid e che taglian permez la collina. Pervia da numerus incendis d'abitadis han ins adina puspè reconstruì da nov la culegna, cuvrind mintgama ils rests vegls da la culegna cun ina stresa d'emplenir. En la part da la culegna ch'è perscrutada il meglier han ins pudì registrar in pachet da stresas d'ina grossezza da 5-6 m cun 16 differentas fasas. Cazas-Cresta ha furni ina gronda quantita da material da chattada, tranter auter 53 objects da metal e circa 13 000 stgaglias da recipients d'arschiglia. Per datar las stresas da culegna dal temp da bronz tempriv fin mesaun è vegnì fixà in rom temporal da l'onn 2000 fin 1300 a.C. a basa da 30 dataziuns cun la metoda da radiocarbon. En connex cun insaquantas datas sorprendentas dal temp da crap tempriv n'enconusch'ins fin ussa nagin material chattà. En la part superiura da la successiun da las stresas èn vegnidadas a la glisch ultra da las chattadas dal temp da bronz mesaun e tardiv er talas dal temp da fier pli vegl e pli giuven. Ins suppona che la colonisaziun da la Cresta haja dura da circa 1900 a.C. fin a 400 a.C., probablmain senza lungas interrupziuns.

La tschiffada da la funtauna da San Murezzan

La tschiffada da la funtauna da San Murezzan ch'ins ha exchavà l'onn 1907 è vegnida examinada detagliadamain durant ils onns 1995-1999. La tschiffada sa cumpona d'ina construcziun da travs exteriura, d'ina chascha d'aissas interuira e da dus bishens centralis. In terz bischen sa chattava ordaifer la construcziun da travs. Las registraziuns da l'effectiv ed ils plans da 1907 han pudì vegnir curregids e cumpletts a maun da documents, fotografias e novs amassaments. Cun l'examinaziun dendrocronologica da la lina da construcziun, cumplettsa tras ina seria da 36 datas C14, han ins pudì cumprovar la simultanadad da las construcziuns e fi-

lar la dataziun exacta sin il semester da la stad dal 1466 a.C. Il mutagl per il terz bischen ordaifer la construcziun da travs è vegnì taglia gia durant l'enviern 1467/66 a.C. Ils chats da bronz en in dals bishens, duas spadas, in fragment d'ina spada, in stilet ed ina guglia, dateschan da circa 1450 fin il pli tard 1300 a.C. Quests objects èn probablmain vegnids deponids sco regals da consecraziun durant periodas da setgira per garantir che l'aua da la funtauna culia vinavant.

La fossa dal temp da bronz tardiv da Domat

Il 1997 han ins chattà en la zona da culegna dal temp da bronz da Domat ina fossa dal temp da bronz tardiv. La fossa era vegnida situada directamain sper ina fuaina. En la chava radunda da la fossa, 1,5 m profunda ed emplenida cun crappa, han ins chattà il skelet d'ina dunna da circa 50 onns en posiziun da sez vers sanester, cun l'egliada drizzata vers ost. Cun emplenir la fossa avev'ins er empli la fuaina. La construcziun da lain sur la fossa è probablmain stà in tetg. Il cliniez ch'ha ornà la dunna consista d'ina gronda fivla en furma d'artg, da dus ureglins e d'in anè. En il nord da la chavazza sa chattava in oss elavurà d'in gru, dal qual ins n'enconuscha betg la funcziun. La fossa ha cumpligla fragments da dus vaschs. Ils chats permettan tipologicamain ina dataziun en il stgallim HaA. Cun agid da datas da radiocarbon han ins pudì datar la fossa en l'epoca da la fin dal 13avel fin a l'entschatta dal 12avel tschientaner a.C. Il fatg che la dunna ha gi cun ella cliniez e cheramica, tenor la tradiziun da la cultura da Laugen-Melaun, lascha presumar ch'ella deriva d'ina vallada meridiunala da las Alps. La furma extraordinaria da sepultura sto star en connex cun la posiziun speziala da la dunna. Sa tracti forsà d'ina dunna guaridra u d'ina sacerdotia?

Il Grischun dal temp roman

Dal Grischun enconusch'ins oz gia numerusas culegnas romanas e complexs da chat, dals quals ins suppona ch'els derivian da culegnas. Il center da la colonisaziun romana dal Grischun è stà il martgà/vicus roman da Cuira-Welschdörfli cun ses numerus edifizis d'abitare e da mastergnanza e cun plirs edifizis publics, sper in «stabiliment sumegliant ad in champ fortifitg» sin la Curt da Cuira.

En connex cun la via da transit romana stattan il complex da chat sin il Pass dal

Set, las culegnas da Savognin en l'ost da Padnal, Bondo-vitg, ma er Riom (probabel mutatio), Ziràn, Zernez, Bondo-Castelmur (muris) ed auters.

Plinavant datti plirs «stabiliments sumegliants ad in champ fortifitg» dal temp roman tardiv u medieval tempriv en il senn da culegnas fortifitgadas/fortezzas da refugi, tranter auter Castiel-Carschlingg, Casti, probabel er Casti/Vargistagn, Vicosoprano ed auters, ultra da numerus complexs da chat, dals quals ins suppona in connex cun culegnas. Tranter ils chats da fossas domineschan il champ da fossas da Panaduz dal temp roman tardiv/temp medieval tempriv e la necropola da Roveredo (emprim/segund tschientaner). Ulteriurs chats da fossas datti da Cuira/Karlhof e da l'areal Willi, da Cazas, Mon, Casti e.u.v.

Dals sanctuaris romans èn da menziunar quel sin il Pass dal Güglia e la grotta da cult da Ziràn. A Cuira sin l'areal Ackermann hai dà in «local da reuniun per martgaders» cun picturas muralas che represchentan Merkur. En il Grischun èn vegnids venerads en emprima lingia Merkur, ma er Diana, Silvanus, ils «pastores» ed ulteriuras divinitads.

Vials per chars sin il Pass dal Güglia ed en l'Engiadina'Ota cumprovan in barat intensiv da martganzia sur las Alps. Ina prosperitad economica dal prim al terz tschientaner s.C. è vegnida suandada d'in declin economic considerabel durant il terz/quat tschientaner.

La romanisaziun materiala entschaiva en il Grischun praticamain cun la campagna en las Alps, la romanisaziun linguistica è s'extendida probablmain sur plirs tschientaners.

In pitschen complex da chats dal temp roman a Soglio

L'onn 1993 han ins observà en il tschaler d'ina chasa d'abitare a Soglio ina stresa da chats romans che giascheva sin ina deponia da craps. La stresa da cultura ha cumpligla exclusivamain chats dal temp roman, quai vul dir terra sigillata cun ornamentals da reliev e parais glischas, fragments da crias cun manetschs, murters, amforas e recipients da lavetsch, ma er fragments d'ina glisch dad ieli, quadrels, ossa e.u.v. La chattada datescha da la fin dal prim e surtut dal segund/terz tschientaner, en singuls cas eventualmain anc dal quart tschientaner s.C. Suentar ch'ins ha observà il 1996 en in edifiz vischin ultra dals chats romans er chats dal temp preistoric, èsi documentà evidentamain ch'igl

ha dà tant ina culegna dal temp da fier sco er ina culegna romana sin la terrassa sulegiva da Soglio.

Ina bursa da munaida dal 10avel tschientaner da la claustra S. Nicolai a Cuira

Faschond exchavaziuns en l'anteriura claustra S. Nicolai a Cuira han ins chattà il 1997 in pitschen stgazi da munaidas. El era vegnì zuppà en ina foppa en la terra, senza ch'ins avess pudì eruir in recipient. La foppa era vegnida cuvrada cun crappa. Il stgazi cumpliglia 14 munaidas dal 10avel tschientaner, derivantas da zeccas da l'Italia dal Nord e da la Germania. Quatter denars da Milaun battids sut Otto I circa dals onns 960/70 e tschingt denars da Pavia dal medem temp sco er in'imitaziun d'in denar da Pavia (962-967 u pli tard) furman la part taliana. Tranter las munaidas tudestgas sa chattan in cutrin dal duca derivant da Breisach (circa 955-973) sco er mintgama in denar da Worms u Speyer (circa 960/70), da Mainz (circa 960/70) e da Cologna (935/960). La chattada dal stgazi da munaida documentescha il traffic transalpin sur ils pass grischuns e per lung dal Rain. Tut en tut è represchenta la pli gronda part da las zeccas impurtantas da la ruta da commerci. Ella documentescha ultra da quai la circulaziun da munaida en la regiun da Cuira ch'è gia stada bain maschadada durant il 10avel tschientaner. En connex cun la cumposiziun dal chat dat en egl ch'el cumpliglia tant munaidas da zeccas dal nord sco er dal sid quai che n'è uschiglio betg documentà tranter ils chats grischuns da munaidas dal 10avel tschientaner. La possessura u il possessur è probablmain stà ina persona viaggiatura ch'era en viadi dal nord al sid. I n'è betg cler pertge che questa pitschna bursa en la cuntravalur da dals portgs è vegnida zuppada gist al lieu nua ch'è vegnida construïda pli tard la claustra S. Nicolai.

Dus stgagis da munaidas da l'Engiadina'Ota (18avel tschientaner)

En occasion d'ina renovaziun d'ina chasa engiadinaisa a Puntraschigna han ins chattà l'atun 1997 ina pitschna chascha da lain cun in satget fatg stgagina cun 243 munaidas. La chascha era mirada en sin ina trav dal palantschieu sura. I sa tracta quasi exclusivamain d'uschenumnads «bluzgers» da l'investgieu da Cuira, da la citad da Cuira, dal signuradi da Haldenstein e Reichenau/La Punt dal temp tranter il 1642 ed il 1740. I pudess a tractar d'ina chattada da conservaziun u eventualmain er dad in'unfrenda da construcziun.

Gia en ils onns enturn il 1970 han ins chattà en ina chasa engiadinaisa a S-chanf/Cinuos-chel in stgazi da munaidas cun 28 munaidas battidas en argient ch'era zuppà en in'entgarna da mir. I sa tracta d'in «mezzo scudo» e d'in «6 quarti di scudo» da Karl Emmanuel III dal ducadi da Savoia, respectivamain dal reginavel da Sardegna ch'èn vegnids battids tranter il 1755 ed il 1769. Ultra da quai cumpliglia il stgazi da munaidas in «20 crizers», 13 «12 crizers» ed in «6 crizers», trais talers da 1/2 curuna e trais talers da 1/4 curuna Joseph II e Franz II da l'Austria, battids tranter il 1787 ed il 1797. Il stgazi da munaida da Cinuos-chel è probablmain vegnì zuppà tranter il 1798 ed il 1800 en la chasa correspudenta cun l'intent da conservar quel, suenter ch'igl ha dà durant quels onns pliras dispitas tranter truppas franzosas ed austriacas, durant las qualas las vischnancas indigenas èn savens vegnidadas mulestadas ed er sblundregiadas.

La preschentaaziun:

Dossier «Archeologia – perscrutar ils fastizs preistorics dal Grischun»

Dapli infurmaziuns:

chatta.ch/?hiid=3510
www.chatta.ch